

Uunga siunnersuut: Kalaallit Nunaannut suliffissarsiortut killilersimaarneqarnissaat pillugu Inatsisartut inatsisaata allanngortinneqarneranik Inatsisartut inatsisaat nr. xx, xx 2016-imeersaq

(Inuussutissarsiordermut, Suliffeqarnermut, Niuernermit Nunanullu Allanut Naalakkersuisoq)

Saqqummiussinermut allakkiaq

(Inuussutissarsiordermut, Suliffeqarnermut, Niuernermit Nunanullu Allanut Naalakkersuisoq)

Siullermeerneqarnera

Siunnersuut suliffeqarnermi inatsisinik nutarterinerup ilagaa, suliffeqarnermi periusissiami 2015-imeersumi ”Suliffeqarneq toqqissisimanartoq” inassuteqaatit ilaattut suliarineqarluni.

Immikkut pingaartillugu isiginiagaq maannamutut tassaavoq atorfiit sulisunit najugaqavissunit inuttalerneqartarnissaat sapinngisamik qularnaarneqassasoq, kiisalu nunatsinni avataaneersunik sulisussanik pisariaqartitsinitta annikinnerulersinnissaa.

Siunnersuummi siunnerfiuvoq isumaginninnermi siunnersortit aamma perorsaasut atorfiisa inatsisip atortinneqarfianit peerneqarnissaat, suliassaqarfinni taakkunani sulisussanik amigaateqartoqarnera pissutigalugu.

Taanegareersullu saniatigut siunnersuut aamma aalajangersakkamik saneqqutsisinnaanermut periarfissaqartitsivoq sulinermik inuussutissarsiuteqartut ilaannut, soorlu niuertut sinnisaannut, eqqumiitsuliortunut aamma ilisimatuunut takornariartunillu angallassisartunut, taakkua maannamutut nunatsinni qaammatit pingasut tikillugit sulisinnaatitaammata najugaqarnissamut sulisinnaanermullu akuersissummik peqanngikkaluarlutik.

Siunnersuullu aamma Naalakkersuisunik aalajangersakkanik suliaqarsinnaanermut pisinnaatitsivoq inatsimmi atorfiit pineqartut saniatigut kommunimit akuersissummik piniartoqartussaaneq – imaluunniit piniartoqartariaqannginneq – pillugu, taamaasillunilu eqaatsumik piuinartumillu periarfissaqartitsisoqarluni inuiaqatigiinni taamalu suliffeqarnermi ineriartornermut naapertuuttumik aqqissuussinissamut.

Kommunimit akuersissutip piffissaq atuuffissaa siunnersuut naapertorlugu killilerneqarpoq akuersissut sivisunerpaamik ukiuni marlunni atorsinnaasunngorlugu. Taamatut

allannguinerup kommunimit akuersissutip aamma danskit oqartussaasuisa sulisinnaanermut najugaqarsinnaanermullu akuersissutaasa imminnut malittumik aaqqissuunneqartalernissaat qularnaassavaa, taamalu kommuninit piffissami killiligaanngitsumi akuersissutit ajornartorsiutaajunnaassallutik.

Siunnersuut aqputigalugu Naalackersuisut pisinnaatinneqarput aalajangersagaliortarnissamut, qanoq qinnuteqartunut tunngatillugu kommunit qinnuteqartunik kiisalu kommunalbestyrelsip aalajangiinerinut tunngasunik nalunaarusiortarnissaat pillugit. Taamaaliornikkut ilisimasaqarnerulissaagut atorfiit sorliit inuussutissarsiorunit piumaneqarnerunersut eqqarsaatigalugit, nunatsinni pikkorissarnissanut periarfissanik naleqqusaanissamut periarfissaqartuaannarumalluta.

Taamatut oqaaseqarlunga Inatsisartut akuersaarlutik suliarinninnissaannut siunnersuut tunniutissavara.